

四庫全書

集部

欽定四庫全書

集部
文忠集卷九十四至
七

詳校官庶吉士臣李傳熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣沈立銘

欽定四庫全書

文忠集卷九十四

掖垣類藁一

宋 周必大 撰

紹興三十二年九月任起居郎兼權中書舍人

兵部侍郎周葵兼侍講

壬午九月二十七日

勅朕以眇身學於古訓既詔有司趣講勸之日又延近
輔預從容之觀敢專事於虛文庶共譚於治道增廣仲
尼之益友特招太上之爭臣具官某與學測於聖幾直

聲聞於天下粵自纂承之始首還嚴近之班雖大廷可
告於辰猷而重席未親於畫訪其以詰禁制軍之暇副
予繩愆糾謬之求在熙寧時有若司馬光之正論及元
祐世亦惟范祖禹之醇儒皆於講讀之間傳以箴規之
誼朕思成德之允協爾尚古人之與稽可

婺州觀察使韓恕除知閣門事兼客省四方館

事 壬午八月十五日詞頭

勅句臚傳而漢儀尊侍御正而周德懋欲識先王之遺

意必求當世之舊人具官某忠獻諸孫裕陵自出見聞
至廣故深開朝會之儀廉介有常故不溺膏粱之習雖
爾求安於暮景顧予思肅於昕朝姑借重於廉車以提
綱於賓贊勉圖自力毋復懷歸可

九月二十二日聖旨張說充奉使不受金又辭

免兩人白身恩澤理宜旌賞可特與落階官

勘會張說見係右武大夫榮州刺史

壬午

勅朕副位之初大明黜陟凡膺褒典夫豈徒然具官某以

醞藉而董賓贊之儀以敏達而介皇華之使既却兼金之餽仍還應格之恩擢正州符以風示在列使知見小利如思恭者罰必及而不傷廉如汝說者賞遽加則予一人勸沮之方其庶幾乎可

右諫議大夫任古言孟思恭奉使受賂止罷見任太輕奉聖旨特降一官吏部供本人元係武功大夫吉州刺史落階官授文州刺史

壬

午八月七日

勅具官某出疆脩聘遠有光華凡以客從豈容貨取朕
懼夫流弊之未革也故詔二三執政諄諄誨之而汝言
猶在耳貪已萌心縱不畏四知獨不畏朕乎夫受金之
過小而慢令之罪大此朕所以不汝容而諫大夫所以
重劾也削階罷免往自省循可特降授武功大夫吉州
刺史

安德軍節度使同知太宗正事士街故妻令人
張氏遇紹興三十一年九月二日明堂赦特

贈清河郡夫人安慶軍節度使同知太宗正
事士錢故妻令人曹氏特贈永嘉郡夫人譚
氏信安郡夫人

勅乃者太上皇帝以季秋上辛大享明堂輝胞翟閭罔
不受福矧予服屬之尊閨閭之懿其可以既歿而廢漏
泉之澤乎具封某氏稟秀彊宗來嬪公族雖柔順有聞
於世而年齡獨嗇於天會逢慶霈之行誕錫追榮之典
勉夫以正不及觀麟趾之成裂地而封尚歆此魚軒之

寵可

知泗州夏俊申收復泗州全得盱眙軍免解進
士胡昉之力望優賜推賞仍陶鑄州官十月
二十二日聖旨特與補右廸功郎充泗州司

戶參軍

辛巳

勅某人汝書生也乃能奮其智勇於郊壘未平之秋何
惜一官不以勸有意功名之士可

樞密院奏武功大夫東南第二將廬州駐劄向

琪見充沿邊差遣兼提舉沿淮民社職事修
舉十月十二日聖旨與轉一官特轉遙郡刺
史

勅具官某朕以爾稟氣山西稍更邊任肆因右府之請
而使遙刺一州可謂寵矣江淮之上備禦方嚴勉立殊
勲無負知己可

又奏武德郎建康府駐劄御前右軍副將淮西
安撫司統領軍馬侯守權十月十二日聖旨

與轉一官

勅具官某朕以爾乘邊浸久馭衆有聞不待褰旗斬將之勞而錫以叙遷之命可謂恩矣江淮之上備禦方嚴勉立殊勲以須後寵可

承信郎劉握父寶見年九十八歲該遇明堂大禮赦特封保義郎致仕

勅某人天子省方先見百年者貴老之義也矧均祭澤何吝官榮服我命書永受子孫之養可

閣門看班祇候潘師尹潘師旦張進之並為供職歲久祇應詳熟特與依例落看班二字

勅具官某朕大昕御朝廷見羣下汝嫻於儀矩久閱班聯稍正其名益思祇敬可

紹興三十二年八月十三日聖旨德壽宮官

闕

諸色人等並係日常侍衛應奉可令所屬照應已降赦文各轉兩官資推恩施行

勅某人等朕於事親無所不用其至故凡隸名西內者

推恩率有加焉疊進官榮往圖報効可

提學淮東常平茶鹽王珣奏保義郎監楚州鹽
城縣五祐等鹽場權縣事劉迪忠翊郎監楚
州鹽城縣買納鹽場胡熙知邊兵在近安職
不去各與轉一官

壬午正月二十七日

勅劉迪等乃者強敵踰淮人無固志汝惟小吏獨守其
官使者以聞朕心嘉歎序遷一列少愧懦夫可依前件
嘉州奏新除敷文閣直學士左大中大夫提舉

成都府玉局觀劉觀乞致仕七月二日聖旨與
轉一官致仕

勅蜀士盛於西漢然司馬相如王褒揚雄之徒皆位不
過郎大夫且未有歸老於其鄉者嘉予近侍獨掩前聞
具官某忠信醇固廉清寬博問學施於安平之世議論
見於艱難之時退將真祠歲月久矣古所謂達尊三者
爾蓋兼之上章告歸寵進秩序往遂安車之適庶無大
嗟之嗟可

劉觀上遺表特贈四官

辛巳七月二十一日

勅孔子曰君子疾沒世而名不稱焉若夫仕更三朝而公卿推其德身享耄期而四方儀其行逝者如斯亦可以無憾矣具官某學造乎道文根於理陟降左右早得陳力之誼燕安閭里晚蹈知止之規考終厥命五福備矣進階三品寵以書贊庶幾令聞廣譽後世猶有攷焉可

秉義郎閣門同提點承受常士廉奏主行登寶

位典禮應奉了畢遂次恩賞止乞依孫舜卿
例帶行閣門祇候九月一日聖旨特依所乞
勅具官某朕壓於慈訓拱手三辭而履帝位汝惟幸會
周旋廷中預觀盛儀亦可謂榮也已稍遷厥次毋或不
祇可

湖南提舉司保明到資政殿學士左中大夫知
潭州魏良臣任內起發過賣田產價錢二十
二萬二千九百餘貫九月二十三日聖旨特

與轉一官本官已身亡

辛巳

勅進以德者不可廢功榮其生者胡寧背死茲實馭臣
之柄亦惟厲世之權故具官某以重望服大僚以威名
開巨鎮屬授由之中率嘗增秩以疇庸取甘茂之官方
將刻贊奏相如之札遽檻遺書深惟成命之既行豈以
云亡而遂格追錫詔除之寵足為身後之光可

武翼郎帶御器械兼幹辦皇城司曾覲用隨龍
恩轉一官除遥郡刺史

勅具官某朕祇奉睿謨紹承聖緒加惠不遺於遠服䟽
榮可廢於舊勞爾夙蘊材猷雅精辭藝驂乘而臨代邸
備著忠勤舞干而衛舜階方資謹飭其叙遷於諸使仍
遥刺於名邦尚對恩華益肩報禮可

武功大夫湖南安撫司準備將權全州駐劄第
九將官曹澤不能彈壓將兵致生事窘辱知

州王蓋臣降一官放罷

壬午九月二日

勅具官某昔之為將馭下有律士寧死而不敢犯法况

敢怙衆為亂乎汝何足以知此貶其秩而免之可

三省樞密院奏武鉅昨收復鄧州其知房州司馬倬首遣鄉兵二千人應副錢糧共濟國事

閏二月十七日聖旨特除直秘閣

勅具官某南陽版籍歸我職方幕府上功朕既以差而賞之矣惟汝填臨周郡協比鄰邦悉其賦輿助闢境土寓直圖書之府豈獨為汝勸哉表而出之所以使搢紳介冑間知吾文正公之有後也可

湖北京西制置使吳拱奏敵帥劉萼窺伺襄陽
於隔奴灘奔衝俱被官軍殺退推排立功官
兵三千八百二十九人數內第一等武功大
夫吉州刺史趙振第三等武功大夫兼閣門
宣贊舍人重巽轉一官

勅具官某劉萼帥師窺吾襄漢汝能奮擊遂遏其衝將
拱以言遞陞遙領尚圖忠報毋使功疑可

壬午八月十日
勅並與遙

郡上
轉行

入內侍省寄資拱衛大夫遥郡承宣使李寀

與轉歸吏部特差幹辦內藏庫填見關

壬午

九月十一日

勅祇事宮闈既殫勤力易官銓部厥有故常具官某兢
畏以自修溫純而寡過階視橫班之峻職參留務之崇
藉爾幹材司吾禁帑尚體勤儉之意毋忘出納之公可

資政殿大學士左大中大夫知建康府王綸乞

致仕八月二十二日聖旨與轉一官致仕

辛巳

勅少則歌鹿鳴而薦於朝老則釋麟符而居其里攷昔人而或有在近世以幾希具官某行峻而濟以通學博而歸之正雖先日宦游之不遂而平居譽望之已隆父母無間言故州閭鄉黨皆稱其孝阨窮無怨色故去就出處惟義之歸逮承太上之深知驟極一時之榮遇入間棘槐之列出分桑梓之麾雖膺力之既愆顧歲年之未暮屬間嬰疾遽致為臣稍遷寄祿之階追遂掛冠之志君臣之分終始有光可

王綸上遺表特贈五官

辛巳九月十六日旨揮

勅朕以眇身初承聖緒究觀前日左右輔弼之臣而想其遺風餘烈贈禔之典夫何愛焉具官某有辯博貫通之學有清明敏達之才其踐禁塗則高文大冊鼓動於天下其登右府則崇論宏議簡在於帝心出臨父母之邦奄忽至於大故朕甚傷焉夫古所謂鄉先生者沒則祭於社而後世良二千石民亦奉嘗之爾於二者蓋兼之矣進階五等爰舉舊章所以慰邦人之思非獨為王

氏之寵可

右中奉大夫徽猷閣待制賜紫金魚袋致仕宋

喚上遺表特贈四官

壬午正月二十九日旨
揮

勅昔在慶厯皇祐間人才為盛時惟丞相庠總領衆職
以協贊上治朕緬懷名德而恨不及見也閱從臣之籍
得其曾孫馬流風善政庶或有考今其亡矣寧不慨然
具官某學知守其家材實裕於用被遇徽祖竭誠靖康
謨訓具存忠勤可驗會予初政撫爾遺章茲用興喬木

之恩而賁以增秩貶恩之寵營魂未泯尚知享哉可

武功大夫保寧軍承宣使續環乞將昨解罷御

藥院恩澤內轉一官與承信郎瞿志行見今

官上收使

辛巳十月二十四日

勅某官退休而貶恩外廷之與內侍一也汝用是以遷
秩不既幸乎尚思所以稱此者可特授承節郎

入內內侍省寄資武節郎蔣世忠入內內侍省

寄資武翼郎梁思並為父病特與轉歸吏部

守本官致仕

勅某人等汝久已抱病不勝洒掃之職俾歸銓部遂掛銀璫如其有瘳可以自佚可

右迪功郎余武康用紹興十六年隨韓京軍自廣東往福建平賊至梅州殺併賴權節林細花一十火第一等功轉一官循入右從事郎勅具官某盜授首於梅川今十有六年矣而汝猶賫伐以為請功疑惟重不汝靳也毋以幸得而忘報焉可

紹興二十四年五月五日勅節文常州勘到承
節郎趙不屈為打死人力時議特降一官元
定私罪杖情理稍重

勅具官某僕隸犯上固當深懲榜而斃之則太甚矣鑄
官一等繼此毋然可

左武大夫鄂州駐劄御前中軍第十將正將吳
宏因培刻隊下食錢等事三十二年四月十
七日聖旨降一官令本軍自効該六月十三

日大赦叙復

勅坐法而貶會赦而叙厥惟邦典朕則何心具官某服
在轅門幸參將列乃繇剥下稍抑橫階累月復之可謂
幸矣夫赦固不數而法常可畏徃思報効勿蹈前非可
三十二年九月六日勅陳誠之董德元余堯弼
並與復端明殿學士宋樸鄭仲熊巫伋章復
魏師遜汪勃史才並與復龍圖閣學士見任
宮祠人依舊汪勃與宮觀

陳誠之董德元

勅朕以六月丙子承前訓履帝位蓋南鄉三辭而後受
羣臣之謁眷懷邇列雖不在廷而慶澤所加當繇貴始
具官某以雅正之文冠多士以忱恂之行慕古人參執
事樞宜昭譽聞久游故里實簡朕心夫禮大臣則國體
尊褒耆舊則民風厚況於初政其敢愆忘秘殿通班時
維異數書不云乎爾身在外乃心罔不在王室毋以久
滯周南遂廢謀猷之告也可

余堯弼宋樸鄭仲熊巫伋章夏魏師遜汪勃

史才

堯弼用進
班秘殿

勅日月麗天大人有繼明之象雷雨作解君子推宥過
之恩盖不遺一介之臣矧敢忘成德之彥邦彛是式寵
命其敷具官某雅望足以服人宏才足以濟務壽聖嘗
加於禮貌眇冲尚識其儀刑久安閭里之游茲值國家
之慶進班內閣仍處珍臺盛德日新方仰承於慈訓遠
猷辰告尚有望於舊人

二制既出而臣寮有
言奉聖旨別聽旨揮

贛州寧都縣孚惠廟神特封靈應侯

勅某神贛之北鄙有壯哉縣其民勤故力穡而賦厚其地饒故閔雨則農傷惟爾有神禱焉輒應削章來上朕用歎嘉進爵徹侯增光廟祀尚其受職永庇一方可

忠州申取應宗子趙不括昨於紹興二十九年

取到夔州路轉運司文解當年九月赴四川

制置司類省試院覆試中第六名丁憂赴御

試不及補承信郎

壬午六月二十三日

勅某人乃者深念宗盟或游蜀道均以十人之制蠲其萬里之來汝既中程是當錫命往聯右列尚勉後圖可

隨龍使臣張興世孫璫並與除閣門祇候先次

供職支破諸般請給候有闕日依資次撥填

入額

九月十九日

勅某人汝服勞潛卽會朕龍飛可謂非常之遇矣列名上閣豈常格所當得哉深體異恩往祇乃事可

成忠郎吳昱特與除閣門宣贊舍人日下供職

壬午九月二十一日

勅具官某唐郭子儀功止一身而八子皆貴顯朝廷今
吳氏父子兄弟並為名將有大功於西州其可不使汝
入仕王畿而稱朕寵綏之意乎往贊朝儀尚識朕指可

光州城西威惠廟中尊威惠顯應侯加封英格

威惠顯應侯東位昭惠順應侯加封武格昭

惠順應侯西位孚惠靈應侯加封忠格孚惠

靈應侯 壬午八月七日

勅某神等疇昔敵師擾吾淮服乃眷期思之壤有嚴威
惠之祠靈若降於雲中厲遂驅於山左鼎加美號顯答
陰功尚秩祀以依人永孚休而受職可

榮州刺史利州路兵馬鈐轄御前中軍統吳挺
除主管熙河路經畧安撫司公事馬步軍都

總管兼知熙州依舊充御前中軍統制 壬午

勅朕惟熙寧轉戰乃得狄道枹罕而郡縣之中值多艱
淪於戎橐一披輿地之圖未嘗不深嘆而屢歎也具官

某忠孝智勇本於家傳坐以中堅力摧強敵舊疆寢復
朕甚嘉焉就畀帥權付之西畧兵法曰善戰者致人不
致於人爾父子為我善謀之可

承信郎牛永壽牛師正因父武功大夫牛皓陣
亡補官依赦換給王清男王仲申貴男申明

換給承信郎同詞

壬午八月二十八日

勅具官某爾父皓捐身為國朕用憫傷悉錄其孤仍加
真命視漢羽林之養不曰厚恩乎可

東南第四副將范雄丁母憂起復武功大夫護

聖軍統領官左祐起復同詞

但改云爾
久服轅門

勅某人爾久控要津屬羅家難方時右武可廢奪情勉
立戰多以成陵母之志可

登極赦書德壽宮見今侍衛親從官僚等於今

赦合轉官外特與各轉兩官數內武功大夫

成州團練使陳子常階官遙郡上各轉行一

官

勅事吾君父既有成勞推國恩榮豈遵常度具官某謙
恭有守通敏無疵屬布慶條沓來茂渥升之橫列益以
干城往服褒嘉務勤夙夜可特授右武大夫某州防禦
使

資政殿學士左中大夫魏良臣轉一官致仕

勅四十強而仕七十致其政名遂身退天之道也眷予
舊弼以疾告歸雖欲留之顧何及矣具官某果藝闕達
為國寶臣本之以忠槩文之以儒術故昔嘗大用而國

人皆以為喜今茲得謝則又惜之夫直諒之節顯於朝廷豈弟之政著於數路卿大夫出處如是亦難矣增秩而去豈不身名俱榮也哉可

魏良臣上遺表贈五官

勅昔吾盛時朝多故老疑則咨以政祀則召之陪厥今幾人又失一鑑具官某慷慨自許純明不欺勇於義故臨難而弗辭裕於才故居官而可紀雖經濟之功未究而蕃宣之績屢書予惟汝嘉歲不我與知其疾固已憂

矣聞其訃為之惻然不有追褒孰紓悼念往進階於五等尚服寵於九京可

左從政郎新德慶府教授陳文彥前任惠安縣尉右宣義郎新知邵武軍泰寧縣李叔謨前任晉江縣尉從義郎張建前任惠安等四縣
汾海小兜巡檢右文林郎建康府觀察推官
魯宗鎮前任同安縣尉並為透漏商販往密
州降一官

勅具官某古者自王畿達貨賄於諸侯猶以節傳出之
今商人遵海而南放於琅邪可謂遠矣汝昔為尉弗察
也雖欲逃責得乎可

巡檢云汝職警捕弗察
壬午四月三十日勅

中亮大夫宣州觀察使殿前左軍統制閻德於

殿帥趙密前高聲無禮聖旨階官遙郡上降

一官令本司自効

辛巳十一月二十四日

勅漢李廣不謝大將軍意象愠怒終以離郵况功名未
及廣者乎具官某知軍法犯上者殺而惡言忿色蔑視

主帥豈汝或有辭耶深治則矜愚不治則廢法崇階遙寄皆少損之可

密球元係拱衛大夫文州刺史因虛詞進狀論

山地事降兩官遇赦已叙一官今滿再期再

叙未復官

壬午六月十日

勅再期而叙其官法也抑有恩存焉具官某頃以懷讓抵罪今盡除之朕恩厚矣毋謂法所當得而不思報可保義郎監鎮江府金壇縣酒稅榮蔣借支合得

職田米俸米及不知有加量米數特降一官

壬午閏二月二十四日

勅具官某貸粟於官且忘其不槩焉皆過之小者吾猶薄責所以勉汝廉也可

承節郎前權峽州蜀江巡檢李政不即追捕强

盜該恩及去官特降一官

壬午五月五日

勅具官某寇攘為患從而不擒是食焉而曠其職也更赦勿治其特貶之可

修武郎監成都府新都縣商稅劉世寧誤保李

餘慶詐冒陳乞李青陣亡恩澤降一官

壬午

閏二月二十六日

勅具官某朕閔死政之孤故許貤恩於族黨今以偽聞是欺也不於爾保任者責之將誰責耶可

立皇太子潛卽官吏等特與轉兩官資登寶位

應隨龍官吏并諸色祇應人軍兵等各特與

轉四官資

八月十九日奉旨

勅某人等汝以中涓祇事潛邸自己已已至於丙子曾未
浹日而值朕登儲御極之慶可謂幸矣進階六等與夫
累歲月而得者相萬也盍思所以稱是哉可

故贈開府儀同三司楊政妻崇國夫人南氏獻
助錢引十五萬道二子楊屢楊庠特補成忠
郎

勅某人等昔汝父政乘寨底績今汝母南入貲贍國子
惟寵嘉之優命以官蓋將慰輦鼓之恩而稱鳴鳩之壹

非獨尊顯汝曹以風百姓也可

幹辦內東門梁康民張安上轉歸吏部充德壽

宮差遣

勅具官某等共惟太上非心黃屋而樂遊大庭之館命
汝入衛可無異恩茲用解房闥之權賦銓曹之祿往祇
乃事勿替恭勤可

忠訓郎王瑛除閣門祗候

勅具官某爾父久提銳旅嘗立戰多肆爾弟兄並膺寵

數往參二閣勉習朝儀可

黃圭除閣門祇候

勅具官某高門之地文石之班隸職其間與有榮耀今以命汝尚其祇欽可

入內內侍省寄資武翼郎黃昭慶與轉歸吏部
先次參部出給請受文歷特差主管台州崇
道觀任便居住 壬午六月八日

勅具官某爾久以謹敏給事官掖歸之銓部憫其勞也

賦之祠祿優以恩也往其懋承之哉可

承信郎陳雋母某氏年九十五歲該紹興三十一年明堂赦封太儒人

勅某氏爾年且期頤而有子從仕庶幾詩人所謂壽母者肆因祭澤列之命婦告而族黨侈我榮懷可

左武大夫忠州團練使杜勝因任東南第九將

違法決軍兵致死降一官放罷見降作刺史

遇登極赦叙元官

七月二十三日

勅曠蕩之恩何辜不釋矧如青固在虧除具官某頃以
任威稍裁遙寄茲逢霈澤一洗丹書復爾練戎謹於御
下可

右武大夫和州防禦使添差江南西路兵馬鈐

轄撫州駐劄李貴特降兩官仍落遙郡放罷
送撫州居住令臨安府差得力使臣軍兵管

押前去 壬午八月二十四日

勅具官某漢雲中守尚上功差六級下吏削爵隋文帝

著令盜邊穀一升坐法斬首蓋法嚴則人不犯是乃所以為寬也汝既欲冒陷陣得城之功又取府庫之金而有之廷尉請論如律朕以犯在赦前特從寬宥下從諸使仍削遙防徙之臨川可以三省其過矣可

敦武郎監明州戶部贍軍酒庫許濤承節郎監明州戶部贍軍酒庫祝端表並為不覺察專

知官借貸官錢特降一官更展二年磨勘

壬

午三月二十日

勅具官某等嚴則人不敢犯明則人不能犯汝職筦庫
二者咸無焉出納之間吏得移用者以此鐫官一等少
警曠瘼可

帶御器械宋鈞權知閣門事

勅具官某隰朋閑習進退赤也願相會同是知朝廷之
間古人蓋以觀禮爾溫純有恪詞采甚文拔繇執戟之
聯試以司儀之事踰階歷位其糾正之濟濟翔翔則予
以懌可

文忠集卷九十四

欽定四庫全書

文忠集卷九十五

掖垣類藁二

宋 周必大 撰

岳陽軍節度使韓公喬遇卒已明堂赦封贈三

代

曾祖

勅賜位特進吾故相也慶澤所加纔及父祖而已若夫
擁旄授鉞寶班常伯之下然恩乃及其三世國家寵綏

右列可謂厚矣具官某曾祖某躬履懿行溢為休聲肆其曾孫享此貴仕曩訖總章之祀尚稽霈澤之行正公保于儲宮發幽光于泉窆靈其未泯歆我異恩可

保信軍節度使鄭藻贈曾祖甫同詞但中改云徙王爵于會稽廣神釐于泉窆

曾祖母

勅古者公卿大夫皆王侯之後故夫人起家而居有其爵位後世仕進有通塞世閥有盛衰不假追崇則魚軒

之寵未易致也茲推祭澤爰舉彛章故具封某氏垂範
有初流徽無數福祿嗇于當世富貴鍾其後人祿以小
君既頒殊寵易之大郡更廣餘榮若存若亡俱可以無
憾矣可

鄭藻曾祖母韓魯國夫人劉氏贈鎮楚國夫人
同詞但改云福祿成于當世富貴鍾其後人祿
以小君既頒疊組易之大國更廣餘榮

祖

勅行慶止于明則其施也狹矣恤下遺其先則為善者
怠矣故國家每躬三歲之祀于赦令首致志焉此德澤
所以配天地光榮所以被存沒也具官某蓄其善不享
其報畸于人取必于天再世而興疊膺邦渙東宮之秩
遂亞師垣尚祇服于寵章以貽休于後嗣可

鄭藻祖任太師鎮南軍節度使充中太一官使
樂平郡王謚僖靖追封長樂郡王紳特追封南
陽郡王同詞但改云具官某位高公衮名重戚

藩再世而興屢頒成渙追王之寵遂奠新疆云

云

祖母

勅宗祀行乎路寢而澤及斧封順孫貴乎朝廷而寵加
祖妣此本朝之惠術而前代之闕典也某氏夙推婦順
力致家肥昔雖無湯沐之封今屢下絲綸之命會逢大
享乃眷遺芳其更名郡之封益正小君之號存者不匱
追榮之典未央死如有知垂裕之心斯在可

鄭藻祖母陳國夫人李氏特贈漢國夫人同詞
但改云具封某氏助成后德力致家肥昔已開
湯沐之封今屢下絲綸之命會逢大享乃眷遺
芳載更廣漢之區益正小君之號云云

父

勅祭以大夫不如負米之為樂襁之華袞不如假板予
其生誰無是心天則難必推我露蕭之澤慰而風木之
悲具官某善積厥躬慶鍾于子實太上攀龍之舊膺大

藩植纛之儀屢寵賁其先人浸擬倫于三少茲緣邦賚
遂正宮師豈特為身後之榮抑將慰生者之志可

鄭藻故父任檢校少保陸海軍節度使滎陽郡
開國公謚榮恭贈太師追封吳國公翼之追封
越國公同詞但改云具官某修身無玷積善有
餘生備極于光榮歿屢加于褒飾徙封禹會益
廣漢釐冀夫未泯之靈服我至優之寵

故母

勅配天其澤小大不遺率土之濱幽明奚間矧一時之
勞舊逢大祀之慶成錫以漏泉之恩成其念母之孝具
封某氏女功素茂婦順無違家積善而慶有餘子欲養
而親不待屬龐恩之誕布推茂渥以徙封尚承邦休永
燕家廟可

妻

勅共惟太上比享合宮既以韓侯爵位之崇衍其采邑
復眷王氏閨門之懿易以脂田顧嘉惠之已敷逮眇躬

而申錫具封某氏事夫以正持下則寬早共艱難閔勤勞而勸之義晚同休顯循法度以承其先久膺象服之華茲易龍舒之壤尚祇邦渙以對神釐可

龍神衛四廂都指揮使鎮南軍承宣使荆南駐劄御前諸軍都統制李道該遇三十一年九月二日赦封贈父母妻

故父

勅共惟太上皇帝不愛牲玉以大享于九筵齋明之誠

上通于穹昊滲漉之澤下決于泉塗有命既敷我其申
錫具官某修身無玷積善有餘生不逮于官榮歿乃繇
子子貴其加州綬以廣神釐冀夫未泯之靈服我至優
之寵可

故母

勅夫為大夫妻為命婦古之制也况乎有子通顯而逢
國家宗祀之慶者哉具封某氏端靜飭躬惠和睦族雖
母訓著聞于世而邦榮不在其身會逢胙祇之施重錫

溫恭之號服予休命永燕烝嘗可

妻

勅邇者太上皇帝祭則受福方介萬年之祉肆推惠術以寵綏二三豪俊之臣可無褒章以光貴其閨閫具官妻某氏柔順以飭已端肅以齊家富貴鼎來子孫未艾會逢霈澤誕舉慶條仍加碩太之封益顯莊姜之美朕恩甚寵其懋承之可

左中奉大夫充敷文閣待制提舉江州太平興

國宮周綰遇明堂赦封贈父母

故父贈特進遇特贈開府儀同三司

勅祭以大夫不如負米之為樂襁之華袞不如假板于
其生誰無是心天則難必推我露蕭之澤慰而風木之
悲具官某休聲藹于荆東雅志齋于泉下鍾英子舍為
世儒宗正位從班既逢于宗祀追榮禰廟遂越于庶僚
往膺三事之儀永作九京之寵可

故母安定郡夫人葉氏特贈榮國夫人

勅古者公卿大夫皆王侯之後故夫人起家而居有其
爵位後世仕進有通塞世間有盛衰不假追榮則魚軒
之寵未易致也茲推祭澤爰舉彛章故具封某氏家積
善而慶有餘子欲養而親不待劬躬燾後既屢錫于夫
榮婉德娘賢其可稽于母貴啟封成國廣我蕃釐徃持
告第之書丕顯擇鄰之敕可

承節郎許宋烈因人陳論爭競事到江陰軍衙
宋烈意恨知軍楊師中不斷下狀人高聲咆

特降一官

壬午四月十日

勅具官某紛爭小過也抗二千石則無忌憚矣削官一等尚省厥愆可

太尉寧國軍節度使提舉佑神觀吳蓋除太尉
封贈三代外妻永嘉郡夫人趙氏特封通義
郡夫人

勅朕日奉親歡恩隆母黨矧如叔舅嘗冠武階當稽舊
章加寵內子命既行矣我其舉之具封某氏姆訓夙聞

閨風甚肅自上安下比值于夫榮秀外惠中併嘉于婦
順相攸封邑改昨眉陽尚知吾命名之嘉以篤爾偕老
之慶可

承節郎監資州盤石縣石同鎮酒稅兼合同場
李有卿為承例令鋪戶等認稅錢并因人帶
酒入鎮情告買酒將布等折錢等事特降一

官 壬午五月二十九日

勅具官某爾職在征商才不足以革弊公不足以守法

其小懲之可

承節卽前監朝天嘉川兩程受納支遣煙火賊盜公事徐希賢在任失覺察攢司于赤厯內大椿糧米及專斗等乞覓特降一官

勅具官某舞文受賕刀筆吏之常態也汝不繩之是為失職貶秩之罰尚將何辭可

承節卽于誠為建康府差監造床榻受板木牙人人情錢降一官

勅具官某汝為小吏不守廉隅若無薄懲何以示誠可

武德郎兼閤門宣贊舍人前權知施州甄援為
說諭合千人告首通判龐信孺及獨銜奏案
又有虛妄特降兩官

勅具官某汝比繇功次擢守邊州幸倖貳之為姦諷胥
徒而敢告單辭具獄法既不容上奏肆欺情尤叵恕往
從貶削無怠省循可

九月二十二日聖旨姚仲罷宮觀降充郢州防

禦使達州居住 尋改峽州

勅高皇之善將將惟在賞誅楊僕之失尊尊難逃譴黜
具官某幸當一面久長萬夫適狂胡麋至之秋乘元師
鼓行之勢乃動違于節制且多失于事機水洛之行故
為逗撓朝那之戰獨爾敗奔劾書既以驛聞軍志固當
薄責未忍盡從于漢法贖以庶人姑令上比于街亭貶
之三等仍收還于祠廩俾循省于山城朕恩甚隆汝過
毋貳可

蜀州勘到右從事郎前崇慶軍節度判官李藻
左文林郎前崇慶軍節度推官楊師中各坐
循例大支請受及買官估賣米及妄指遠程
支借送還人請受各降一資

勅具官某等漢法小吏私有附益猶坐左遷况爾多取
于公家乎稍褫文資以申邦法禮曰臨財毋苟得尚戒
之哉可

廣東經畧司申修武郎閣門祗候添差東南第

十一副將李宏前去贛州龍南等縣擒獲兇賊沈才等及投降到出首曾珏等二十餘人特與轉一官

勅具官某嶺表郡縣北接贛境谿谷篳竹之間羣盜蓋走集焉汝能捕獲約降以舉其職進官一等用勸事功可

潼川府知通按劾右文林郎知潼川府鹽亭縣蒲待聘失覺察人吏取覓等事刑部斷徒一

年半該赦特降雨資

勅具官某汝前治邑亡狀以被劾于守承雖曰赦原豈容幸免可

知明州韓仲通復敷文閣直學士知平江府沈介復敷文閣待制

勅視天下猶棄弊屣之易仰惟舜德之難名為人上若馭朽索之危伏念禹勤之當懋不有循良之在列孰推德意以及民茲頒曠蕩之恩併獎蕃宣之効韓仲通等

皆太上軒墀之舊奉甘泉筆橐之華或潤色詞垣擅張
說蘇瓌之譽或幹旋版部慕計然范蠡之風久去周行
間臨侯服屬紹承于大統思褒表于群工故因滌瑕蕩
垢之文顯示考績陟明之意咨爾兩郡並孚衆言戢橋
虔之吏而里閭安塞併兼之塗而倉廩實其特還于寵
數以申勸于治功庶幾中外之聞風罔不公勤而効職
可

先是刑部依赦檢舉前任侍從官並復職而
言者論其太泛以仲通等治郡有聲故先復

楚國夫人吳氏特贈秦魏國夫人

壬午十月五日

勅因親廣愛情方篤于外家隱卒崇終恩蓋隆于從母
肆頒徽數用寄深悲具封某氏婉孌而靜專肅恭而謙
忘鍾令儀于德閤託同氣于坤寧賜爵臨光無用事顯
權之過追蹤馬氏敦小心有禮之風胡不百年奄茲長
夜是用稽漢室封君之制參本朝疊組之規祔沐邑于
兩邦易脂田于全楚淑靈如在茂渥其承可

進武副尉陳玠轉承信郎

壬午

勅某人乃者祖妣聖容歸安原廟汝嘗服役例獲進階

往祇異恩尚勉來効可

保義郎孫璋特與轉一官令吏部添差沿邊兵

官一次

八月二十三日

勅具官某爾久陷窮荒耻食其祿非天資忠義安能自守如此進秩而官使之庶幾知逆順者有所勸焉可

閣門祇候王瑀持祖母餘服起復充殿前司副將

勅某人朕以爾材勇有聞故不待遂服而付以偏裨之

事往齊部伍用稱使令可

成都府勘到保義郎趙善仁娶有服婦人不報
父母并擅離廣都縣商稅任所特降一官

勅具官某詩有娶妻必告之言書以畔官離次為戒汝
犯二不韙無乃傷吾信厚之風乎其鑄一官往思補過
可

靜江府義寧縣惠寧廟義寧侯加封義寧靈澤

侯
壬午閏二月十一日

勅某神詩曰明昭上帝迄用康年朕既德薄初承天序
未能有所格也顧瞻桂嶺邈在萬里逆時雨寧風旱繁
爾有神是賴予惟寵嘉之其詔禮官申加美號庸示朕
報功之義焉尚服寵光益隆貺施可

潯州廣佑廟顯應普惠侯加封顯應普惠靈澤
侯同詞但改桂嶺二字為潯江

壬午六月一日

昭慶軍節度使提舉佑神觀劉懋乞致仕六月

二日聖旨依所乞

壬午

勅聯戚畹之華均內祠之佚見其進者矣未見急流而
勇退者也非夫恬于勢利而有過人之識則軒冕丘園
孰能知所擇哉具官某操行安和性資靜重如漢秦世
起于良家如唐孝德能教諸子正書求去朕不得而留
也其以吳興之節垂車就第夫身無朝謁之勞而坐視
子孫之貴可謂安且榮矣易之有終吉詩之無後艱懋
其庶幾焉可

張浚按知濠州忠翊郎閣門祗候都遇不遵宣

司指揮不受歸正人乞特降一官與宮祠貼
黃稱都遇持身稍廉惟性不通七月二十九
日聖旨依

勅具官某朕舉江淮兵民之寄屬之元老王侯宿將未
有不聽指縱者汝名典郡實隸戲下愚而自用賤而自
專以犯聖人之戒可無懲乎亟命投閒仍從削秩過而
能改朕不汝忘可

忠翊郎前監建州在城鹽稅務藍宗禮特降一

官

壬午三月十日

勅具官某汝職在闕譏乃殉貨于監臨之吏褫官一等
尚訟厥愆可

承節郎劉師中收受崔詢錢許為圖窠坐事發

捉師中未獲師中陳狀特降一官

壬午六月二日

勅具官某規利營私汝曹常態既形牒訴當稍治之可

石泉軍勘右從事郎前彭州軍事判官張瑁為

族姊之夫扈拭不法事囑右從政郎彭州錄

事參軍

闕

侯從輕結案改換情節各特降一

資

壬午閏二月二十五日

勅具官某書曰以公滅私民其允懷今爾瑁背公而庇其親爾悞徇私而失厥職議獄如此輸孚若何其加小懲以警羣吏可

左從政郎前昌州軍事推官劉弁為在任令吏人共偕佃戶貼陪錢送家屬歸鄉該恩特降

一資

壬午閏二月二十二日

勅具官某郡縣吏送迎之費率取給于常平國家養廉如此其周也汝猶責備胥徒使有所附益豈法意哉薄示誠懲勿忘循省可

右從政郎南安軍錄參向沔為勘上猶知縣留

清國公事稽滯特降一資

壬午四月六日

勅具官某爾為郡督郵治屬邑之獄至累月不決豈以同官為寮思有所縱捨歟抑實遲緩不及事也部使者以聞其薄責之可

徽猷閣直學士左朝散大夫致仕鄭望之上遺

表特贈四官

七月二十八日

勅朕惟得人之難從古所病粵自新進蓋詳試以事為
至于老成乃可觀其德望奄茲淪謝寧不盡傷故具官
某志氣可以折衝材猷可以治劇閱世久而心尚壯更
事多而智愈明上大夫歸老子家已辭厚祿鄉先生沒
祭于社何必舊邦載嘉削牘之遺忠特茂書棺之異寵
庶幾幽壤知我追褒可

七月十三日聖旨故岳飛起自行伍不踰數年
位至將相而能事上以忠御衆有法屢立功
効不自矜誇餘烈遺風至今不泯去冬出戍
鄂渚之衆師行不擾動有紀律道路之人歸
功于飛飛雖坐事以沒而太上皇帝念之不
忘今可仰承聖意與追復原官以禮改葬訪
求其後特與錄用

勅仁皇在位親明利用之勲神祖御邦首祭狄青之象

蓋念舊者不忘于拔拭而勸功者當急于褒崇朕祇稟
睿謨眷懷宿將茲仰承于素志肆盡洗于丹書故前少
保武勝定國軍節度使武昌郡開國公食邑六千一百
戶食實封二千六百戶岳飛拔自偏裨驟當方面智略
不專于古法沉雄殆得于天資事上以忠至無嫌于辰
告行師有律幾不犯于秋毫外摧孔熾之邊兵內剪方
張之劇盜名之難揜衆所共聞會中原方議于橐弓而
當路力成于投杼坐急絳侯之繫莫然內史之灰逮更

化之云初示褒忠之有漸思其姓氏既仍節制于岳陽
念爾子孫人復孤惻于嶺表欲盡還其寵數乃下屬于
眇躬是用峻升孤棘之班疊昇齋壇之組近畿禮葬少
酬魏闕之心故邑追封更慰轅門之望不獨發幽光于
既往庶幾鼓義氣于方來嗟夫聞李牧之為人殆將撫
髀闕西平而未錄敢緩旌賢如其有知可以無憾可

武經郎提點都亭驛班荆館兼主管教習譯語

李啓應辦使人十次無遺闕特轉一官

壬午

四月十一日

勅汝司橐街之邸蕪蒙胥之職將迎至于十數無乏吾事亦可以為勞矣進官一等尚知勉哉可

昭宣使福州觀察使入內侍省都知李綽用
隨龍恩轉景福殿使遙郡承宣使

勅景福置使蓋祥符之異恩留後名官為遙領之極軌
兼榮而授豈輕也哉具官某稟端良之資著忠謹之譽
擢參內宰方勉令圖茲推攀附之恩特示褒遷之寵尚

思補報以答眷知可

修武郎充閤門兼祇應蘇永堅轉一官

勅具官某爾以詔相之勤攀附之舊獻言自列援比求
遷稍進一階示朕記錄不忘之意益思祇敬毋忝恩榮
可

故敷文閣待制蔣璩用二十五年二十八年郊
祀恩贈父右宣奉大夫

勅國家饗帝之恩過時而不廢臣子顯親之澤雖歿而

猶施嗚呼斯亦仁之至義之盡矣故具官某鍾英望族
沉迹下僚是生賢嗣嘗位禁從不幸追榮之典未及而
璨之墓木拱矣追加命秩告于其第死者有知庶幾父
子之心亦可少慰于地下乎可

前執政某人先除資政殿學士宮觀續有言章

十月九日聖旨改除端明殿學士依舊宮祠
勅帝堯之禪重華共工罪去貞觀之承武德裴寂免歸
惟否臧舉聽于僉言故用舍非由于二道具官某負懷

慨敢為之氣被聖神特達之知擢自禁塗聯于政路逮
冲人之紹服方虛已以仰成會吾耳目之官責爾股肱
之情謂臨事乏推賢之誼而運籌多誤國之謀非名宰
而資貪殊乖素望如聞人而言偽莫稱具瞻因其引咎
以陳辭許以奉身而去位迫于重劾雖稍裁內殿之班
曲示寬恩猶不廢外祠之祿尚懲前事思勉後圖可

婉容翟氏進封特與依格合得恩澤親屬故武

節郎蔣世忠特與贈武義大夫

壬午

勅具官某朕勵精圖治始于齊家登逮俗華助修陰教
固未嘗因其私謁而為之貶恩也若夫推之人情而協
稽之法意而順則亦無所靳焉爾以外姻嘗登右列茲
用正于七品以追賁于九原尚其有知服我休命可

婉容翟氏進封親屬張氏與封淑人劉氏與封

孺人

勅具封某氏朕初嗣服不邇聲色後宮蓋闕如也永惟
婦職有不容廢故擇良家之合法相者登備嬪御之列

其選可謂重矣夫選重則禮厚禮厚則恩隆于其私親
能勿褒乎往服嘉名以光柔度可

太尉劉錡守本宮致仕

壬午二月十日陳乞十
五日降旨

勅濟京口之流正資遠畧卧壺頭之病遽釋中權念勾
奴未減之秋豈飛將告歸之日既瀕于殆莫得而留具
官某性根忠義之門學造詩書之府蘇辛父子名著山
西信布爪牙功高淮北久困排根而幽屏晚繇拔擢以
遄歸衆競論功爾則弢武人之正誰能辭富爾惟固君

子之窮逮宣閫外之威旋廸師中之吉屬間移疾勉使
奉祠念已逼于膏肓顧何施于藥石眷焉推轂曾未終
倚注之懷許以垂車庶少遂退休之志可

劉錡上遺表贈開府儀同三司

二月二十五日

勅岑彭亡而公孫平諸葛死而仲達走雖成功有命不
及見于生前而餘烈在人可徐觀于身後肆頒愍典用
振幽光故具官某結髮而控西陲影纓而號良將智謀
輕戰士之勇謙退蹈儒生之風穎尾出奇基二十年之

盟好皐林力戰挫數十萬之賊鋒會美疾之有加曾殊
勛之未究奄終厥命實惻我心進聯三事之儀庸作九
原之賁噫自古皆有死悵爾志之莫伸與賊不俱生尚
孤忠之可諒緬惟英爽歆此哀榮可

隨龍醫官成安大夫貴州團練使能誠階官遙

郡各轉兩官

十月十四日

勅具官某朕比以汝有職西內丙進其階詔墨猶未乾
也今復推攀附之恩遷官而進使領焉徒以汝精于藝

故也汝往矣周旋兩官無忘祇敬以服予一人之寵命可

成安大夫陳孝廉階官上轉兩官遙郡上轉行
兩官

勅具官某汝久共醫事効職潛藩肆朕龍興當推異數
崇階遙寄併以授之朕方躋斯民于仁壽之域尚稽汝
十全之效而制食焉勉進其技以服新渥可

武功大夫果州團練使兼閣門宣贊舍人李觀

階官上轉行一官

勅大明麗天萬物咸被其光澤以爾具官某久司賓贊
逮事初潛時畀橫階蓋非常格往圖報稱勿負恩榮可
武功大夫王公濟階官上轉一官遙郡上轉行
兩官改云以爾具官某久殫勤力事朕初潛特
畀橫階仍升遙領往圖報効勿負恩榮

趙渭郭毅並轉六官

勅具官某大明麗天萬物咸被其光澤爾等並由幸會

服役潛藩超進六階尚圖報効可

故右監門衛大將軍郢州防禦使士闕贈昭化

軍承宣使追封安康郡公 故右監門衛大

將軍眉州防禦使士寔贈鎮東軍承宣使追

封會稽郡公 故右監門衛大將軍復州防

禦使士階贈保寧軍承宣使追封東陽郡公

勅朕初承天序方將大封同姓以藩屏帝室而天不憖遺俾我二三伯父叔父皆早世以歿易褒崇之恩為贈

祔之典可不為之大哀耶皇叔祖故具官某等胄出祖宗而支屬未䟽身享富貴而恭儉無偽奄茲淪謝命也何居其繇諸衛之聯寵以兩使之重且即其郡而加賜諸公之印綬焉詩不云乎爾之教矣民胥效矣咨爾曰方尚識朕親九族之意豈特慰夫死者而已哉可

故和州防禦使士伍贈安慶軍節度使舒國公
同詞但改兩句云其繇扞防超畀節鉞且即其
地而加賜

內侍鄭詢為久病可將見任官特與換白雲處

士賜名守寧

壬午五月二十五日

勅某人國家寧予人以祿而重予人以名故一字之褒
千鍾之粟弗若也汝給事宮掖見謂謹畏浮雲之志有
動于中太上嘉焉更以美名而賜之隱者之號可謂榮
矣爾其精心香火以祝聖人之壽庶幾圖報萬一焉可
知海州魏勝中箭病篤其妻子氏割股與食遂

得安愈特封安人

壬午三月七日

勅某氏昔辟司徒之妻以有禮封于石窰今勝守吾邊
壘正辟司徒之職也爾能不愛尺寸之膚愈勝夷傷之
疾非特有禮而已表而出之進聯命婦視古列女其庶
幾乎可

文忠集卷九十五

欽定四庫全書

文忠集卷九十六

掖垣類稿三

宋 周必大 撰

洋州威顯廟惠應豐澤侯加封惠應豐澤靈貺

侯

壬午三月十四日

勅某神昔漢宣帝聞益州金馬碧鷄之神遣諫大夫褒
持節求之朕則不然以年穀順成為上瑞以斯民仁壽
為福應今爾侯寔能順皇之德體朕之意使幅幘千里

雪霜風雨之以時水旱厲疫之不作厥功茂焉其衍嘉
名以昭貺施朕庶幾無愧于馨薦侯尚眷顧坤維而永
茂之可

威州高瑀山康祐廟寧應侯加封孚惠寧應侯

同詞但改坤維作華戎

壬午五月十九日

靜江府臨桂縣靈懿廟開天御道娘娘封昭惠

夫人

壬午閏二月十一日

勅某神漢長陵女子號為神君武帝舍之上林祕祝而

已未聞為民祈福也。瞻言南服屹彼靈祠，轉水旱為豐年，散札瘥為和氣，慰一方之望乎。尚念粵人無違鷄卜，可靜江府清惠廟廣慈顯佑恭懿夫人加封孚應廣慈顯佑恭懿夫人同詞，但改顧何愛懿號為顧何愛申命之寵。

泉州德化縣威惠廟靈助侯加封嘉顯靈助侯勅某神舜受堯禪望秩于山川，徧于羣神我祖宗肆大青于初元，亦咸秩無文以徼福于上下。朕既不德上帝

神明未歆享也永惟聖王先民後已思欲遠施而不求其報今部刺史上言爾侯利功之博著于閩海寧風旱弭災兵驅虎豹朕閱章悚然何以獲神之況哉其詔詞官亟加顯號以示無德不報之誼焉可

郴州蘓仙觀冲素真人禱雨靈應加號冲素普

應真人

壬午九月十日

勅朕聞之仙以忠孝仁義為本然則馭風騎氣雖已遊乎八極之外而所以眷顧舊邦者宜未忘也具封陰功

宿植妙道早成白馬飄然千有餘歲屢豐之應于今賴
之是用按天寶之祠衍元符之號至人莫測于強名顧
何有哉亦俯從衆志而已可

四川宣撫并制置司奏武功大夫建州觀察使
致仕田開元係御前右軍統領軍馬昨因金
瘡發動致仕乞令再任十二月十三日奉旨
依

勅具官某鄉以邊陲罷警聽汝告歸今征西之師轉戰

而前此拔士為將之時也況如汝者忠勇有聞其可屏居南山以射獵為樂哉勉起據鞍共赴功名之會可

按伴使洪邁等保奏權知泗州修武郎閤門祇

候劉繹應副人使無敗闕時轉武翼郎閤門

宣贊舍人

三十二年五月十五日勅

勅具官某日者干戈未解輶傳已來爾假守新疆乃能無違郊勞贈賄之儀各贍隸人牧圉之事以無憂客使朕甚嘉之峻陟武階進司賓贊蓋朕記人之功如此其

尚勉哉可

權軍事判官承信郎王璵權錄叅承信郎孫鑑

各轉一官

勅具官某屬者單于遣使款塞而吾疆吏廷勞無違雖
曰二千石指畫之勤亦惟爾一二僚吏伙助之効序遷
一列思稱異恩可

中衛大夫復州防禦使主管台州崇道觀閻德

叙復原官中亮大夫宣州觀察使

勅天方春而萬物生理之常也朕率是道以宥多辟具
官某頃陵主將嘗示誠懲茲會霈恩盡從甄叙在易之
巽首曰利武人之正志治也爾尚知此哉可

閩州南部縣逕池里稅戶馬文貴年一百二歲

依紹興三十一年九月明堂赦補右廸功郎

致仕

壬午十月十七日勅

勅某人爾生于嘉祐及見八朝攷司民之版如者蓋無
幾也雖微赦令猶將祿之況宗祀已行之慶乎往服冠

裳榮受孫曾之養可

宗子伯詔在建康日應辦事務委有勤勞可特

與補承信郎特添差建康府不釐務兵馬監

押請給人從並依正官例支破

壬午九月十九日

勅某人朕恭承內禪推恩同姓幾于支庶畢侯矣汝才智有餘頃得于一見之間宜錫官榮且寵以員外同正之祿勉差其行待器使焉可

李顯忠保明采石立功人各得轉四官依旨揮

將一官與遙郡上轉行常潤劉易王勝白選
蘇進馬仙孫善並轉遙郡防禦使彭玘朱真
穆春符鎮高立並轉遙郡團練使曹高交鄭
賓等二十三人並轉遙郡刺史

八月四日勅

勅屬者金人乘國家易置大將之際親執旗鼓來窺天
塹吾戈船競進敵幾殲焉具官某等勇足冠軍忠能敵
愾並乘機會克有偶功特越常彞逋陞遙領昔之名將
不逢辰而泯沒者多矣汝曹丁時右武而有朕信賞勸

功之君誠能奮其志謀掃清河洛則萬戶侯何足道哉
在汝勉之而已可依前件

知澧州唐時奏路分都監武功大夫降授文州
刺史宋寔怒不支供給意欲行兇降一官送

潭州居住

勅具官某貪饕者士伍之態也汝稍顯矣乃不顧伐檀
相鼠之刺以被劾于守臣其上一官遷之會府古有廉
約小心不越法度而為將者汝試攷之庶自警焉可

舒州觀察使安康郡開國侯戴臯該六月十三日赦封贈父母妻

故父贈武節大夫謹特贈武顯大夫

勅日月之明何幽不燭雨露之澤既沒猶霑朕方求端于天茲用大賚于下某官生而無玷以善其身死而有憑以開厥後載嘉爾子視秩觀風會吾需恩追賁禰廟盖令遷秩用答教忠可

故母恭人彭氏特贈碩人

勅國家揖遜授受于一堂之上寔無愧乎舜禹若夫生
者有叙遷之寵歿者有追崇之恩則亦典謨所未聞也
具封某氏為婦而順為母則慈茲值邦榮有嘉子貴其
即溫恭之號追遷碩大之封閔章甚華幽隧知享可

妻恭人晉氏特封碩人

勅婦人之爵雖曰從夫然非朝廷有殊常之慶則其褒
崇也鮮矣具封某氏祗事蘋蓩服勞組紃宗族敬焉室
家宜焉是用推吾御極之恩錫爾進封之命周南之勉

以正召南之勸以義皆婦人事也尚念之哉可

澧州彭山英澤廟廣澤顯烈公加封廣澤顯烈

順濟公

十月十九日

勅某神朕聞至治之世陰陽和風雨時民無害菑則亦
無瀆于神肆惟寡昧初承聖緒德未足以承天意澤未
足以浸黎元况澧陽去國數千里懍乎惟懼歲事之難
而人生之勤也爾公以帝子之貴留遺愛于民尸而祝
之社而稷之六百年于茲矣旱暵之憂解風雹之變銷

威靈赫然大庇千里不加顯號孰著厥功詩不云乎誕
后稷之穡有相之道而今後滋有望于公也可

廬州焦湖德濟廟靈應助順妃加封孚顯靈應

助順妃

元狀云自漢廟食今千有餘年環湖
四百里舟船久賴安濟去年十月金

人敗盟首犯淮西截斷焦湖南道之路累要
入湖剽掠每至湖口風濤顛猛不敢侵犯

勅某神我國家敬共事神二百年于茲矣夫豈惟水旱
癘疫之是為亦惟疆場或駭則資神休以庇我民也某
妃受命富闕為吾川后平居則安流而濟舟楫遇難則

揚波而杜寇戎州以事聞朕用嘉嘆其增稱謂以答威靈尚憑寵光簫勺羣慝可

德順軍東北三十里隴千北山亂石秋神嘉潤

公加封顯應嘉潤公

吳璘保奏元豐元年早勞獲應封嘉潤侯宣和

三年加封嘉潤公昨來官軍與金人大戰陰雨晦冥三日不止委是風雲助順又本軍新復未踰月旱乾苗稿祈禱霽然壬午八月八日勅

勅某神助順而予直幽明之理一也爾公早承天寵久隔王靈涵蓄風雲待時以發故雷電晦冥于戰攻之際

而雨暘時若于還定之初可謂有勞于國有功于民者
矣益增美號用侈殊休疆事既平則封崇之典未艾也
可

和州烏江縣西楚霸王先準勅賜英惠廟特封

靈祐王

淮西安撫轉運司申金人去年侵犯
本路金主親攜千餘騎上廟燒香乞

坏琬過江數琬不允金主令人毀拆殿屋欲
要放火焚燒之時只見殿內東梁上有一大
蛇出現又聽得殿後大林內如數千人發喊
叫殺金主大驚左右皆走壬午三月二十九
日

勅某神朕惟祖龍將亡江神返辟苻堅既敗草木皆兵
昔猶疑之今驗斯語某神拔起之威靈乎諸侯之上蓋
世之氣凜然千載之下金人不減違天背盟乃骹涉吾
地而聽于神神聰明正直者也寧不吐之耶是故穆卜
則龜違慢侮則虺見如聞叱吒之聲而強兵辟易于數
里之外矣神之威靈大矣哉宜錫真封就加顯號王其
益恢況施以佑淮民民亦將世世奉王無怠可

知撫州張孝祥復集英殿修撰

十月三日

勅具官某周有大賚惟富善人漢賜璽書以勉循吏朕
初嗣服寔兼用之以爾俊明辯博豈弟忠信文學政事
左右具宜出臨大邦治狀稱最是用循詞垣之故步貼
書殿之新班既厚恩榮亦隆眷倚夫德之裕者乃可以
大受才之充者乃可以泛應故入則功名不減治郡而
出則智略無異在前朕方待爾以全才爾尚益博于賢
德可

德壽官醫官保安即致仕史佚依敕轉兩官

勅具官某乃者戊寅赦令凡在服之臣咸進秩一等而奉事吾君親者獨加厚焉爾以醫名與逢幸會故雖納祿不廢推恩深體眷私勉圖報稱可

雷化州兇賊凌鐵等就擒并殺戮餘黨官吏推思下項前本路帥臣李如岡見係敷文閣待制知廣州今轉一官

勅乃者盜發海康陵水之間一方騷然既底嚴誅是頒信賞具官某選繇近列出鎮南交愚民美兵未遑曲宥

徙薪之計元惡就繫寔有發縱指示之謀進以一階用
甄多績惟嶺海去國萬里民生甚艱蠻蜚之與居瘴癘
之是虞爾其仁以撫之明以察之毋使寇攘姦宄相煽
以變然後草雉禽獮以傷吾好生之德往欽哉若茲多
訓可

本路提刑余良弼見知靜江府今轉一官同詞
但改云以爾選由良吏奉使南交

本路運判鄧酢已身故特贈一官直秘閣

勅具官某爾自為布衣已知慷慨論事及宰百里又嘗
踊躍用兵亦可謂有志于事功者矣付以交廣之節蓋
將試而用焉果能奮其智謀殄滅羣盜方疇伐閱遽歎
淪亡追錫文階升華冊府非獨慰夫死者亦尚賁爾子
孫可

東南第十二將武節郎高居弁武翼郎高森忠
翊郎鄧富進義校尉廖琮成忠郎王宏各轉
兩官

勅具官某人等嶺海之間寇攘嘯聚有嘉將士各効勇
功既縛渠魁遂殲群醜策勲來上躡進兩階徃厲忠圖
稱吾醲賞可

知化州廖顥知容州歐陽庠雷州簽判歐陽堅

知化州吳川縣周孝稱武經郎岑瑾武翼郎

徐觀忠翊郎胡大同保義郎陳宸羅紋承節

郎賀福陳紹宗承信郎林勝王世昌成忠郎

崔迪各轉一官

勅具官某人等嶺海之間寇攘嘯聚汝惟分職各効其勤既縛渠魁遂殲群醜策勲來上序進一階往厲忠圖稱吾醲賞可

陣亡人竇彬特贈兩官與一資恩澤李權特贈一官與一資恩澤吳知新特贈一官與一子父職名

勅某人等盜起海濱興師討擊汝等死難鼠革生擒功既當時忠猶可憫追遷厥秩仍錄其孤庶幾有知服我

休命可

江東提舉洪适按發宣州太平知縣左奉議郎
周世昌出谷目于三等入戶苗頭上科獻助

錢特降一官

五月八日

勅具官某日者北邊有釁民竭力以佐軍雖曰樂輸朕
猶惡焉孰使汝頭會箕歛而強所不欲也為令如此承
流安在鑄官一列少謝疲眊可

婺州申金華知縣右通直郎周世修擅移免折

帛錢特降一官 六月二十五日

勅具官某叙其財以待邦之移用雖古職內猶不敢專也汝令耳接用可乎稍褫文階以我無訾省者可

保義郎陳懌乞回覃恩轉官與母羅氏保義郎龔鑒乞回覃恩轉官與所生母劉氏並特封

太孺人 九月二十八日

勅具官某朕以天下之大為父母之養惟恐孝治之未廣也今爾有子奮身右列請還遷秩之寵為爾湯沐之

奉固朕喜聞而樂從者詩不云乎孝子不匱永錫爾類
朕心庶幾焉可

內侍張璩特與落致仕羗充追冊皇后攢宮都

監

十月十五日

勅某人朕興故劒之悲致南國之奉思得近習之通練
謹畏者掌其屬禁詢于左右僉曰汝宜已掛之冠為我
復彈可也可

岳飛孫甫申經緯紀綱並特與補承信郎

十月八日

勅某人等善善及其子孫春秋之誼也乃祖既信眉于地下矣其可使汝曹尚與編氓齒乎各命以官勉圖報國可

賢妃夏氏進封本位官吏諸色人合行推恩數
內代手分克主管文字承信郎侯士通特與
轉一官

勅某人等朕登進列妃助修內治汝幸甚廼得隸名增
成而服役于外官遷寵矣尚徃欽哉可

提點鑄錢司魏安行申道判饒州權州事張綸
申募職官李璘項膺不肯那允賀登極銀絹
有悖慢不恭之心送提刑司取勘提刑葉謙
亨却申張綸違法十月二十八日奉聖旨張
綸非理借允魏安行按劾失當各特展二年
磨勘李璘項膺奉公守職各循一資

勅具官某等守道次于守官奪志難于奪帥汝為幕吏
不屈郡丞寧受悖慢之誣靡忘出納之吝劾書既上朕

為直之進以一階明示好惡凡百有位觀吾此舉可以奉公守職而無悼後害矣可

承節郎錢庫修臨安府城第二等功轉一官

九

月二十七日

勅具官某漢城長安至發侯王之徒隸今亡是也間民無常職則予其直而庸焉人既子來功宜亟就迨茲第賞雖刀筆吏不遺也徃思報稱毋怠廉勤可

鎮江都統制張子蓋除淮南東路招撫使

十一

月十三日

勅朕初履基圖兼懷蕃漢閔故國遺黎之無告而北方
衆狄之交爭既聞襁負以來歸其忍區分而弗救瞻言
飛將實控要津雖以至仁伐不仁屢贊弔民之盛舉然
殺無道就有道豈吾為政之本心莫如隆寄委之名可
以付綏懷之事具官某竭忠抱義天性使然御衆行師
家傳有自眷而諸父首濟中興江淮知萬福之名帷幄
決子房之勝偉竒材之復見振舊閥以有光起自家居

付之間制席卷南徐之甲雲披東海之圍既參華孤保
以疇爾雋功復假寵使權以使吾隆指蓋招攜以禮而
懷之以德朕所樂為顧撫我則后而虐之則讐彼將焉
往惟不爭而勝者天之道惟不戰可屈者人之兵爾其
指日以圖勲朕敢踰時而吝賞勉思國事力暢天聲可
起復忠訓郎閣門祗候護聖軍副將王瑀再丁
母楚國夫人憂起復

勅具官某爾職在轅門名參上閣閱時未久而重有憂

其卒起之勿辭王事可

十月二十七日聖旨趙述係故韓王趙普五世
孫可落致仕與轉防禦使在京宮觀免奉朝

請

勅昔我藝祖應天順人革有周之命時惟忠獻王允文
且武克左右昭事厥辟以垂統于罔極於穆清廟首配
享于大烝群后莫及焉肆朕纂服念王業之難不可忘
思佐命之臣不可見也故訪其後人而寵綏之以爾具

官某五世之孫而四朝之舊也端良練達太上所知膺力既愆謝事而去朕惟擅功名者慶流苗裔論故國者謂有世臣其進扞防復從官政欲其自近故優爾內祠之祿矜其既老故蠲爾朝會之儀念祖報功庶其在此爾尚體予至意毋遏佚前人之光可

降授成忠郎閤門祗候都遇與復元官

十一月四日

勅具官某前吾元帥雖以違命劾汝亦以廉直稱汝可謂愛而知其惡矣朕既因其言以貶汝亦因其言以復

汝可謂觀過斯知仁矣汝尚去所短而信所長朕將拔擢而加任使焉可

報登寶位使副下三節人轉官

勅某人等兵交使猶在其間况北方善意初未絕乎此朕于御極之始所以不廢傳諭之使也一時屬吏優進以官式端其行毋憚遠役可

武顯大夫樞密院吏房副承旨董球為曹涉應得差遣不肯呈行特降一官

勅具官某緣絕簿書此百官府之常態也汝猶職樞省
亦爾耶貶秩示懲後當自愛可

武翼郎皇甫偁與轉三官除閣門宣贊舍人

十

一月十三日

勅具官某淮漢以北燕薊以南民吾故民土吾故土淪
陷雖久其父老子弟豈無戴宋而思自奮者乎今爾崛
起陳蔡之間力當一面以少繫衆屢收雋功朕甚嘉之
進階三等參華上閤未足以旌汝也修爾車馬礪爾鋒

乃朕將命將徂征而與偕行焉可

節度使曹勛贈三代

登極赦恩

曾祖東頭供奉官贈太子少保方叔特贈太

子太保

勅朕初承大統既增近臣之秩以共此慶澤猶以為未
也又推其追遠念祖之心而錫以三世之寵焉嗚呼斯
亦仁政之大端也故具官某中潛懿行外著休聲嗟丁
位之陸沉逮曾孫而鼎貴奉萬年之策于太上艱難之

始迎六駟之駕于慈寧契濶之時積有敷庸遂膺旄鉞
侈恩榮于家廟屢下密章正公保于儲宮益除愍典百
年雖遠其尚有知可

祖任辰州叙浦縣尉贈太子少傅之器贈太
子太傅

勅昔之人修身隱德知無求于世而已夫豈知賴後世
之澤而冀贈祿也哉然國家貴其子孫而遺其父祖殆
非所以勸善而教孝也故具官某受才甚美學古惟勤

命乃不融止于一尉至孫而大褒典屢加邦命維新善人是賚進班儲傳益正其名告第有書告幽有詔服吾異寵祚爾後昆可

故父任武經郎閣門宣贊舍人贈太師組追封譙國公

勅朕觀自昔嫺于詞藝之士身既不顯家亦隨替者多矣孰能生則被遇於承平之世沒而加祿以上公之章如曹氏乎必繇積善使然非獨以能自見也故具官某

才高而敏行飭以和逮事祐陵贊儀上閣閱其多祉以遺後人擁節在廷奉祠賦祿會覃御極之慶貶爾漏泉之恩正位公師已云顯矣啟封成國尚克享之可

所生母懷澤郡夫人王氏特贈琅琊郡夫人
勅母以子貴雖曰古誼然不值我非常之慶則何以伸爾無窮之悲具封某氏有端靜之風有儉勤之行是生良子為世舊臣觀其謙敬可以知母之賢視其詞采可以知母之教旌幢烜赫悵莫奉于安輿印綬光華俾游

加于幽壤配天之澤奕世毋忘可

故妻咸寧郡夫人王氏特贈琅邪郡夫人

勅朕于纂臨之初下安穆之冊言念臣工之貴孰無伉儷之思推廣寵恩追加寵渥故具封某氏稟資柔潔御下寬和閔君子有汝墳之風循法度得采蘋之義嗟久同于甘苦乃不逮其光榮茲錫命書徙封名郡雖無從於偕老尚少慰其悼亡可

故岳飛妻李氏特與復楚國夫人

勅榮悴有時而不同忠邪既久而自判昔飛以篆車締
冕備大將之多儀而李以文駟雕軒正小君之顯號繫
彊宗之鼎盛何奇禍之驟興逮茲天定之時宜爾邦誣
之辨具封某氏柔潔以為質儉勤而自修處安榮不聞
驕妬之愆居患難不改幽閑之操闔門遠徙閱歲屢遷
眷厚前朝既下生還之命志伸今日載加甄叙之榮錫
以土田為其湯沐子孫並仕顧惟晚感以何憂門戶再
興尚識大恩之所自可

男雲追復左武大夫忠州防禦使

勅漢李將軍耻對刀筆之吏寧就死焉未幾子敢亦罹
非命良將數奇自古固然朕未嘗不撫卷而興嗟也故
具官某慷慨忠勇頗有父風困于讒誣不究勲績茲懷
遺烈盡復故官朕既白杜郵之冤爾或知輔氏之報可
男雷追復忠訓郎閤門祗候

勅具官某前世流人多矣亦有父子兄弟死則追褒生
則寵秩如今日者乎國家雨露之恩與天道矣靈如未

泯知享斯榮可

霽復右承事郎與合入差遣震霽並與補保義

郎

勅具官某爾父有戰勝攻取之勲而無奇寵福艾之相
故忠足以結聖主之眷而智不能辨權臣之誣抑鬱九
泉侵尋七閨茲興懷于鼙鼓肆加寵于子孫復以文階
震霽用命續其世祿朕于爾家可謂注意矣爾之一門
何以報我哉可

雲妻鞏氏與復恭人

勅某氏昔者大臣逞憾誣譖舊勲微太上皇帝全度矜容則岳氏一門無噍類矣爾流離嶺海險阻備嘗上奉君姑下撫幼稚以至今非天有以相之耶其詔攸司還昇溫恭之號生爾者太上恤爾者朕躬爾其念兩朝之厚恩勉二子以忠報庶幾他日尚有餘榮可

忠訓即武學博士張德明除閤門祗候與副都

監差遣

勅具官某服采于朝以觀人之器識護兵于外以試人之事功凡用群才皆存深意爾修身閱古多譽無疵右學累年諸生所信列之上閭許以外遷尚勉爾為朕方有試可

皇子府抱笏人張世昌轉一官

勅某人朕大封諸子藩屏京師爾以恭勤隸名邸第進階一等其尚知榮可

劉敦義除武學博士填見闕樊仁遠除武學學

諭填復置闕

十一月十七日

勅某人春學秋射以攷遊倖之藝列于夏官周制也右學蓋其遺意歟爾敦義得師友之淵源爾仁遠慕功名而慷慨進由科選寵以同升古者命將在公卿後世拔士於行伍用非所養議者病之爾其即藝業以求奇士使不待授筆而有自見者可

武節郎侍衛步軍司前軍副將李師顏特差充

閣門宣贊舍人

十一月十二日

勅具官某昔吾藝祖有削平四方之心每臨便坐躬閱
戰士朕雖不武思踵前規爾以偏裨長于騎射寵加要
職歸耀私門尚思殫竭忠勇訓齊部曲以副朕見知之
意焉可

司封員外郎王十朋兼崇政殿說書

勅具官某朕惟臺諫言國家之闕失封駁救命令之過
差猶疑進見之踈或致開陳之後豈若談經于間日許
其坐論以移時庶幾博我以多聞寘我于無過爾傳誠

意正心之學懷愛君憂國之忠氣振于射策之時譽尊
於育才之地剛方之操中外所稱既副旁招其令入侍
惟昔咸平之盛稍循天策之規遴擇英髦進陪講讀晝
則密承于顧問夕則遞宿于禁嚴朕將舉此舊章爾尚
知吾殊遇可

嚴州建德縣百姓徐億年一百歲補右迪功郎
致仕

勅某人虞夏商周所貴不同而尚齒則一矧朕方極事

親之孝尤以貴老為先爾吾仁祖之遺民也閱世久矣
因壽域之躋懷既醉之福則錫命之寵豈獨慰爾子孫
哉朕意固有屬也可

故靜江軍旅宣使天水郡開國侯士嶸贈開府
儀同三司追封和國公

勅國家寵待近屬獨殊庶官雖爵秩之並崇曾事為之
弗責用能九族之既睦而無二叔之不咸逮沒原身更
加異數恩惟義稱人豈吾私故具官某生則戒侈驕之

習長而遊翰墨之藝謙勤待士性實使然共恪會朝老
猶不怠暨朕纂承之日有懷信厚之風命已不融心焉
是悼袞衣赤舄樾台路之多儀胙土苴茅徹厯陽之奧
壤尚其未泯知享斯榮可

翰林醫愈陳端夫該婉容翟氏進封轉額外翰
林醫痊

勅某人內有九嬪猶外之九卿也既升位號宜錫恩章
爾以技聞例遷厥秩茲惟異數可不勉哉可

宗子伯瑀三經覆試不中年四十以上補承信

即

勅某人汝席慶天支自力于學雖三戰不勝而其志可嘉禮曰四十強而仕汝年至矣錫之一命毋怠初心可

文忠集卷九十六